

J.B. Li. - zbiór Illichalskiego

XVIII. 2. 15

<http://rcin.org.pl>

D E
LINGVA POLONICA
COLLOQUIUM
A

S E L E C T I S
ORATORIÆ FACULTATIS
A L U M N I S
I N S T I T U T U M
V A R S A V I Æ
IN AULA SCHOLARUM
SOCIETATIS JESU
ANNO A PARTU VIRGINIS MDCCLII.



Typis Sacrae Regiae Majestatis in Collegio
Societatis JESU.



XVIII. 2. 19

CELSISSIMO PRINCIPI
ANTONIO LUBOMIRSKI
PALATINO LUBLINENSI

Franciscus Bohomolec Societatis JESU.

Cum à quodam Viro, non minus Tibi
PRINCEPS CELSISSEME quam musis addicto
didicisses, selectos in Scholis nostris Juvenes
de nativa sermonis Polonici integritate de-
clamaturos esse, tantopere hoc argumento
delectatus es; ut te huic illorum exercita-
zioni interfuturum promiseris. Hunc nuncium quam à illi
Juvenes latitia exceperint, haud facile est dictu. Quid
enim illis aut optabilius, aut honorificentius accidere po-
tuisse? Sed negotiorum moles, qua Tibi eo die sustinenda
pro munere fuit, & nos speratiō solatiō, & declamationem
istam maximo ornamentiō privavit. Non deerant tamen
nonnulli, non minus natalium splendore, quam literarum
scientiā illustres viri, qui illam præsentia suā ornarent. Hi
cum rem integrā attentius perpendissent, pro sua erga Te
observantia, amoreq; erga Patriam lingvam, bortabantur,

A 2

ut

ut quod auribus Tuis subjecere gestiebam, oculis proponerem:
hoc est ut lucubrationem istam umbratilem, sub Nominis Tui
splendore, publici juris facerem. Audax primum consilium
istud visum est mihi: verebar enim ne res adeo tenuis Tibi
tanto Viro minus conveniret: sed partim authoritas virorum
Tibi addictorum, partim argumentii ipsius dignitas, qua
res etiam exiles illustrare solet, animum meum fluctuantem
ad id audendum inclinavit. Illud quoq; ad querendum.
Nominis Tui huic lucubrationi praesidium non mediocriter me
permovit, quod plurimos ejusmodi homines reperiri non igno-
rem, qui depravatō judiciō voces peregrinas, inter elegan-
tias linguae nostrae reponant, tantoq; se eloquentiores esse exi-
stiment, quanto pluribus ejusmodi vocabulis sermonem suum
infarciant. Ibi, si me lassessere voluerint, firmissimum
telis, eorum clypeum authoritatem Tuam objiciam. Quis
enim est, qui ignoret, quantum tu cura & industria, in ex-
purganda a peregrinis istis quisquiliis lingua nostra collocas,
cum alios exemplū, alios monitis, ad restituendam sermonē
Polonice nativam elegantiam exhortaris, illosq; qui in eodem
tecum curriculo versantur, singulari benevolentia complecte-
ris? Quamobrem si lucubrationem istam tam impense
praesidium tuum querentem minus Te dignam judicaveris,
argumentum saltem illius, studiumq; nostrum ne respue.
Vale.

COL-

COLLOQUIUM DE LINGVA POLONICA

*A*drastus. Tempus istud, quō animum relaxare à contentione studendi confuevimus, ô socii, ludō aliquō, an eruditis conterere sermonibūs placet?

Olintus. Ego ex ludo voluptatem exiguum capio.

Orlandus. Ego vero me libenter ludendo exerceo; multō tamen libentiūs doctis colloquiis vestris intersum.

Eudexus. At quibus, amabo, de rebus sermonem instituere velletis?

Adrastus. Eligite id, quod instituto nostro, ingeniisq; excolendis plurimum conveniat.

Medorus. Res igitur Polonorum præclare gestas in medium proferemus?

Alcander. Id mihi videtur, exiguo hujus temporis spatio minimè accommodatum esse.

Araspes. Ego vestras de Philosophia recentiorum sententias libenter auscultarem.

Orlandus. Id perquam operosum esset, & studiis nostris minimè conveniens.

Olintus. Hanc quæstionem silentiō prætereundam esse censeo, ne in alieno, ut ajunt, choro pedem ponere dicamur. Quid enim de Philosophia dicemus, cùm Rhetoriciis præceptis hucusq; intenti, nondum ejus curriculum

ingressi sumus? Sapientis est autem de illa re, cuius vel nullam, vel modicam tantum cognitionem habes, nihil decernere: probare autem vel condemnare id, quod Tibi exploratissimum non sit, est hominis minime cordati.

Alcander. De præstantia igitur linguarum Græcæ, Latinæ, Italicæ, Gallicæ disceptabimus?

Adrastus. Majore fortassis fructu de sola nostra lingua differemus.

Olintus. Quid vero.

Alcander. Jejunum id mihi videtur esse argumentum.

Adrastus. Illustrem sanè & copiosam disputandi materiam habebimus, si consuetudinem illam, quā peregrina verba Patrio sermoni inserere solemus, discutiāmus: nempe sine abroganda, & delenda, an potius servanda, & propaganda ejusmodi consuetudo?

Medorus. Argumentum colloquii nostri vix aptius, utiliusvè posse reperiri existimo.

Alcander. In eandem cum Adrasto sententiam, omnes manibūs pedibūsq; ituros non dubito.

Araffes. Sententiæ Adrasti omnes suffragamur: sed priusquam hanc quæstionem discutiamus, æquum esse censeo, ut causas, ex quibus hæc consuetudo profluxit, inspiciamus.

Eudoxus. Hac de re neminem melius disceptaturum esse existimo; quam Adrastum. Illi enim & diligens studium rerum antiquarum notitiam, & dicendi facultatem non vulgarem natura est largita.

Olintus.

Olintus. Age Adraſte, non minus auribūs, quām animō ſermonem excipiemus tuum.

Adraſtus. Facultatem illam dicendi, quam mihi adſcribitis ſocii, in me quidem minimē reperio: ne tamen inutilibūs excuſationibūs vos longius distineam, morem voluntati vestræ geram. Linguam noſtram ex Ilyri- ca, ſeu Slavonica natam eſe, communis eſt omnium opinio. Ad Sigismundum primum Regem Polonorum, cùm pauci admodum reperirentur, qui notitiam lingua- rum extēnarum aliquam haberent, incorruptam floruisse nativamq; elegantiam ſuam retinuisse ex teſtimoniis ſcriptorum conſtat. Interjeſtō tandem aliquo temporis intervallo, cùm Sigismundus Augustus Regni noſtri cla- vum teneret, reperiebantur non pauci, qui, ut ex Latinæ linguae ſcientia, famam apud vulgūs magna ex parte tunc rude ſibi conciliarent, primum nonnulla Philosopho- rum, Poētarumq; dicta, deinde etiam ſola verba Latina Patrio ſermoni inſerere cæperunt. Secuti ſunt iſtos alii, qui, [ut Gregorius Cnapius ait] nihil e ſcholis præter verba, retulerunt: ac non jam familiaria colloquia, ſed etiam epiftolas, orationes, libros etiam integros ejusmodi vocabulis infarciebant. Ita paucorum a principio pec- cātum, poſtquam æmulatione imperitorum auctum eſt ac propagatum, tandem eruditorum etiam judicium cor- rupit.

Olintus. Recte ac ſapienter, Adraſte, ut foles, diſſeruisti: At iis tamen temporibūs, foliæ Latinæ voceſ patriiſ inter- ponī solebant; nunc vero; DEUM immortalem! quid aliud

aliud est lingua nostra, quām chaos quoddam ex omnibus omnium nationum linguis conflatum. Jam præter Latinas, Italicæ, Gallicæ, Hispanicæ, Germanicæ, Batavicæ, Britanicæ voces tam in publicos, quām privatos sermones nostros intruduntur. Originem vero & causam hujus etiam consuetudinis, non absimilem esse illi, quam Adraſtus attulerat existimo. Plurimi enim adolescentes Nobilissimi, qui more honestissimo exteris nationes perlustrare solent, plenas, [ut sic dicam] sarcinas peregrinarum vocum in Patriam deferre, easq; iudioribus venditare consueverunt.

Orlandus. At de causa hujus consuetudinis jam satis esse dictum existimo: nunc, siue illa conservanda, an potius abroganda discutiamus.

Alcander. Ego conservandam esse censeo. Omnis enim consuetudo, quæ longo temporum intervallo firmata est, atq; à viris doctis approbata, modo honesta sit, non facile abrogari debet.

Medorus. Rectè addidisti modò honesta sit: mendicare autem ab aliis vocabula, cùm Patria suppetant, quō pacto honestum esse defendes? Neq; consuetudo ista Tibi suffragatur. Cùm etiam contraria, longo temporum tractu firmata sit, & à viris doctis usurpata.

Alcander. Quid igitur? Ignoras fortassis eo tempore, quo piaculum erat, peregrinum vocabulum in Patrium sermonen inducere, rude, ut solemus dicere, seculum in Polonia fuisse, quō vix aliquem reperires, qui vel

vel modicam extēnarum linguarum notitiam haberet.

Olintus. Nunc verò?

Alcander. Nunc verò seculum eruditum merito appellatur.

Olintus. O eruditum sanè seculum, quō vix aliquem reperias, qui Patriam lingvam probè calleat! Quis enim est, quæso, istis temporibūs, qui omnium vocum Poloniarum propriam significationem, vim, ac naturam perspectam habeat? Decreveram aliquoties, ô socii, ne sermo meus, quem cum aliis instituebam, aliquid peregrini redoleret, nescio tamen quō fatō id semper, nec sinè indignatione mihi eveniebat, ut vix unum alterum vè verbū patriū protulerim, cùm illico integræ, ut sic dicam, cohortes illarum vocum, quas vel ex Latio, vel Italia, aut Gallia in suppetias Linguae nostræ adscivimus, ore loquentis erumperent. Reetè id de nobis dici posse existimo, quō dectissimus vir, & de lingua nostra optimè meritus, Gregorius Cnapius ætatis suæ homines perstrinxerat. Vere id, inquit ille, de nostratibus semiliberratis usurpes, qui non turpe sibi ducunt nescire Polonice: & vix aliquam longiorem sententiam proferre possunt, quin & Latinas & Polonicas voces corrumpant, & ex eis putidos centones farciant.

Orlandus. Quid igitur? Num idcirco ignari nostræ linguae Tibi videmur, quod sine adminiculo peregrinarum vocum nuljum sermonem longiorem instituere possimus? Inspice, quæso, in causam hujus difficultatis,

B

& vel

& vel in virus fateberis, inopia id vocum patriarcharum, non
verò ignorantia linguæ nostræ, nobis evenire.

Eudoxus. Miseros nos, qui tam inopes vocabulorum
simus, ut cùm aliquid nobis dicendum est, ab aliis na-
tionibus voces mutuari, ac mendicare cogamur! Quæro
tamen ex te, mi Orlande, veteres illi Poloni, quos, dixistis
non adhibuisse voces peregrinas, quo pacto in tanta ver-
borum inopia animi sui sensa in vulgus enuntiabant?
nutusnè loco vocum illarum, quæ deerant, ut muti
solent, substituebant?

Orlandus. Veteres Poloni

Eudoxus. Quid hæres?

Orlandus. Tunc quidem non deerant verba, sed
multa deinde vel interierunt, vel antiquata sunt.

Eudoxus. Sapienter: at cujus socordia id factum est,
ut tam multæ voces interierint?

Orlandus. Cujus socordia? non socordia cujuspam,
sed temporum injuria id evenire solet.

Eudoxus. Cur vero eadem temporum injuria nihil de-
copia, & splendore aliarum linguarum detraxit?

Alcander. De inopia linguæ nostræ immerito con-
querimur Socii: pridem jam istas nonnullorum querelas
Gregorius Cnapius [a] confutavit, & gravissimis argu-
mentis demonstravit, linguam nostram, vocum penuri-
am non modò non pati, verùm etiam adeo esse locu-
pleteam ut cæteras etiam linguas copia superet.

Eudoxus. Videlis quid isti homines lingvæ nostra-
impo-

[a] In Prafatione ad Thesaurum

imponant! In ejus inopiam id devolunt, quod negligentia
suae, rerumq; novarum studio adscribere deberent.
Evolvite indicem vocabulorum Polonicorum à Cnatio
concinнатum: DEUM immortalem! quot in eo millia
vocum reperietis, quarum nec usum, nec proprietatem,
nunc percipimus!

Araſpes. At non nosti illas voces communi omnium
conspiratione abrogatas jam esse, & vetustate obsoletas?

Eudoxus. Quidni? sed qua ratione, quæſo, abrogatæ
sunt? quia videlicet peregrinas aucupando, nostrarum
notitiam amisimus.

Araſpes. Id non inficior: quid enim vetat obsoletis,
ac barbaris elegantiores, magisq; auribus accommodatas,
undecunq; sint illæ adſcitæ, substituere?

Eudoxus Miror te tam delicatis esse auribus, mi Araſpes, qui illa vocabula ferre jam non possis, quæ doctissimi
mi olim viri, Majores nostri, à quibus omnes scientias
aceperimus, in deliciis habebant! ut enim alios omittam,
eloquentissimus ille vir Petrus Skarga ob eximiam di-
cendi facultatem Chrysostomus Poloniæ dictus, poten-
rat coram Regibus, & frequentissimo Senatu ſæpius
illa verba ſinè piaculo proferre, quæ tu barbara vocas,
& ſinè fastidio audire non potes? Kochanovius ille,
quem Sarbievius cum antiquis Græcorum Romanorumq;
Poëtis conferre non dubitat, quiq; plurium lingua-
rum peritus erat, non erubuit Regum, Principumq;
virorum laudes illis vocibūs. - - - - -

Araſpes. At illis temporibus voces ejusmodi in pretio
B2 fu-

suere, nunc, ut jam sæpius audisti, sunt antiquatæ.

Eudoxus. Sunt antiquatæ ! cur vero antiquatæ ? Posse quidem nonnullas voces abrogari, cum illis aliæ elegantiores ex lingvæ tamen patriæ penu depromptæ substituuntur, non diffiteor : sed quæro ex te, Araspes, num elegantiores Tibi videntur, illæ ab exteris emendicatae quisquiliae ? e.g. awizy, bagaze, desp. kt, diwertyment, dilucidacya, deleguię, fason, facilituię, favoryzuię, fomen-
tuię, equipaz, ewisceruię, indagacya, interpozycya, insynua-
cya, inwalidacya, inquietuię, kortezy, kuzyn, luminarz,
liquiduię, mebluię, molestuię, offerencye, oblatuię, prepona,
paryeruię, renoma, raport, rewanzuię, angizuię, regalizm,
recype, ruminuię, roboruię, requiruię, suspiry, sufficien-
cya, Jakrifukuię, subordynuię, tergiwersacja, werydyk,
woiazuię. & alia ejusdem farinæ. Num suaviores etiam
illæ reliquæ Polonicæ voces, quæ etiamnum nobis su-
persunt ? Cur non antiquatis etiam illa residua patria
vocabula, quibûs hucusq; usi sumus ? Sed quid ego tam-
diu ? Tollite, perme licet, abrogate, delete etiam reli-
qua verba Polonica, & novum aliquem sermonem, ex
omnium nationum linguis conflatæ, dignum Polonis,
dignum auribûs vestrîs delicatissimis, similemq; illi
corniculæ, quæ furtivis aliarum volucrum ornata co-
loribus, risum aliis excussit.

Araspes. Vehementius quâm decuit declamasti, Eudo-
xe, ista tamen vociferatione tua nondum me in eam
sententiam pertraxisti, ut peregrinis verbis uti nobis
liberum non sit. Italis enim, Gallisq; impunè licet
plu-

plurima verba ē Latīo adscita ad sermonem suum adhibere, nobis verō idem non licebit?

Orlandus. Sapienter: hic nodus est. Audiamus, quid isti Censores dicant.

Olintus. Præclarām sānē de nobis victoriā retulisti, Araspes, age, triumpha. Si tamen aures mihi tuas præbere volueris, efficiam, ut ipse etiam fatearis, nihil levius, nihil futilius, & fortassis ineptius nihil esse tuō argumentō.

Araspes. Quidni? Ausculto.

Olintus. Quod Galli, Italiq; Latinas voces ad leges patriæ Lingvæ formatas usurpent, non inficior: sed quæro ex te, Araspes, Italorum Gallorumq; sermo, quanam ex lingua sit profectus? ex Latina, dicas oportet; id enim nemo unquam in dubium vocavit, & tute annuere mihi videris. Nunc amabo, æquumne est, ut liberi Parentum suorum similitudinem quandam referant & mores eorum nonnullos retineant? id etiam negare mihi, nisi pertinax sis, nullō paclō potes. Novum igitur tibi, mirumq; videbitur, eas linguas, quæ ex Latina natæ sunt, præseferre quandam Latini sermonis imaginem, & nonnullas voces, ad leges suas formatas retinere. Cum ex veteri ædificio novum construitur, nonne necesse est, ut prioris ædificii cæmenta in altero reperiantur, quamvis diverso modo collocata? Eadem profectò ratione etiam ille sermo, qui ex Latino constructus est, ac formatus, nonnulla Latina vocabula retinere debet. At nostræ linguæ quid, quæso, rei est cum Gallicâ, Germanica,

Turcica, & cæteris, à quibus sibi voces mendicat, ac
mutuatur?

Medorus. Gratias tibi ago immortales Olinete, quod
noſtri Araspis ante victoriam triumphum, ut ajunt,
canentis audaciam, illustri ſanè argumento repreſſeris.

Araſpes. Illyrica igitur verba, ex quibus noſtram lin-
guam profluxiſſe affirmatis, licebit uſurpare?

Medorus. Quidni! nihil enim yetat ut filia in par-
tem bonorum parentis ſuæ veniat. Immo si diligentius
rem excuſſerimus, omnia noſtra vocabula Illyrica eſſe,
quamvis diuerso flexu formata reperiemus.

Alcander. At ornementi ſaltem gratiâ voces peregrina-
nas patrio ſermoni adſpergere interdum licebit. Habet
enim nescio quid ſuavitatis ſplendorisq; ſermo, qui illis
eſt refertus.

Eudoxus. Iugulaſti me, Alcander, hac tua ſuavitate! cur
gentes aliæ ejusmodi ſplendorem, ac ſuavitatem in ſer-
monem ſuum non patiantur induci? Cur e.g. Gallus,
cùm illi patriâ Linguâ aliquid proferendum eſt, non
adhibet verba Germanica, Polonica & alia hujusmodi?
Cur tu ipſe Alcander, cùm Latinè loqueris, Polonicas, aut
Gallicas voces in Latino ſermone non adhibes?

Alcander. Id conſuetudo illis vetat, at nobis eadem
ſuffragatur.

Eudoxus. Næ tu homo riſiculus eſt! quis enim præcla-
ram iſtam tuam conſuetudinem ignorat? nos vero ſitne
conſervanda, aut potius abroganda ejusmodi conſuetudo,
dispu-

disputamus. Principium igitur, ut Philosophi dicunt, petis, cum id ipsum, quod in quæstione versatur, pro ratione affers.

Olinus. Rectè, ac sapienter tuo more differuisti, Eudoxe. Quæ enim alia gens est, quæ linguam suam peregrinis vocibus contaminari patiatur? Ne illi quidem populi, quos barbaros vocamus, id ferunt. Cæteris tamen omnibus palmam eripiunt Itali & Galli, qui idcirco cætus quosdam virorum doctrinâ illustrum instituerunt, [Galli nempe Parisiis, Itali Florentiæ] ut summo studiô ac diligentia aditum peregrinis vocibus omnem, ad linguam suam præcludant: et si quam forte ejusmodi voculam irrepsisse adverterint, illico eam è linguae suæ finibus ejicient, proscribant, atq; exilio plestant sempiternō. Id ipsum ad conservandam Germanici sermonis nativam integritatem castitatemq;, Saxones Lipsiæ moliri, publicâ famâ accepimus. Moschi quoq; strenuam linguae suæ illustrandæ operam navare incipiunt, & idcirco multis literarum peritis viris cura demandata est, ut celebriores libri Russico incorrupto sermone reddantur. Et inter leges Academiæ Petropolitanæ, undevicesima vetat, ne præter Latinam Russicamq; alia lingua scribatur, Et diarium & commentationes Academicorum, deniq; omnia que ex isto cætu in lucem proferruntur, Latinè aut Russicè scribi debent, Gallicâ autem Germanicâve lingua nihil quidquam publicarum rerum traditor (a)

Ad.

[a] De offic. Acad: lege XIX.

Adrastus. Quamvis magno conatu nonnullæ enuntiantur gentes, ne illorum lingua peregrinis verbis corrumptatur, quis tamen antiquis Romanis hac in re diligenter potest esse, qui ne Græcæ quidem linguæ, quam tamen plurimi faciebant, ullam voculam in sermone suo ferre potuerunt. Ut enim alios silentio præteream, Tiberius Imperator, teste Suetonio, priusquam Græcam vocem monopolium proferret, veniam à Senatu petiit. Idem ex quodam Patrum conscriptorum decreto Græcam vocem emblemma ejici jussit, ac peregrinæ Latinam substituendam, vel si facile reperiri non posset, pluribus, aut per ambitum verborum enuntiandam esse censuit. Princeps etiam non minus eloquentiæ quam linguæ latinæ Ciceron, Lib: I. offic: eo sermone nobis utendum, inquit, qui notus sit, ne ut quidam Græca verba inculcantes, jure optimo irrideamur. Horatius quoq; illum Poétam qui Latinis carminibus verba Græca inserebat Lib: I. Satyrā 10. expludit.

At magnum fecit quod verbis Græca Latinis
Miscuit, o seri studiorum, quidnè putetis
Difficile, & mirum, Rhodio quod Pitholeonti
Contigit. At sermo lingua concinnus utraq;
Suavior: ut Chio nota si commista Falerni est.

Alcander. Commodissimè de Cicerone mentionem fecisti
Adraste; jam te teneo.

Eudoxus. Nunquid?

Alcander. Antiquos Romanos non potuisse pati in sermone

mone latino voces Græcas dixisti: at Cicero ille tuus, cuius auctoritate jugulare nos voluisti, nobis potius, quam vobis suffragatur. Evolve, si placet, illius ad Atticum epistolas, quin & illas, quas ad Familares suos scriptitabat, DEUM immortalem! quot in illis voces Græcas reperias? Principi igitur eloquentiæ, & Latinæ linguæ Parenti peregrinas voces patriis interponere liberum fuit, nobis idem non licebit?

Araspes. Superi te incolumem servent, mi Alcander, causam nostram fluctuantem, ac prope jam cadentem erexisti. Quid vobis nunc animi est hostes vocum peregrinarum?

Eudoxus. Vicisti Alcander! age! triumpha! memineris tamen non deesse nobis tela; quibus te triumphantem profligare & victoriam istam è manibus, ut ajunt, extorquere possimus. Quæro enim ex te; illa Græca vocabula, integra, & inviolata, an vero ritu latino inflexa à Cicerone efferebantur? Integra, & quidem Græcis literis descripta vel invitus satéri debes. Immerito igitur Ciceronis auctoritate abuteris ad propugnandos illos vestros, quos pulcherrime vocatis *macaronismos*, qui nihil aliud sunt, quam peregrina verba, ad normam sermonis nostri formata, & contorta. Deinde linguam Græcam præstantissimam, & matrem omnium ferè scientiarum fuisse non ignoras. Quid igitur mirum, si aliqua gravis sententia, aut cujuspiam Philosophi Græci illustre dictum, apud Latinos Scriptores reperiatur? Cum enim Romani multas

scientias artesq; liberales à Græcis acceperint , necesse fuit, ut effata etiam illorum nonnulla , & nomina earum artium apud se retinerent. Nos verò non jam sententiā aliquam; sed ipsa quoq; verba, neq; ex præstantioribus tantum linguis, sed ex barbaris etiam decerpta, scriptis, diuersisq; nostris perperam ingerimus. Illud quoq; inter nostram, ac Ciceronis consuetudinem discriminem intercedit, quod ille perparcè, & necessitate coactus vocabulis Græcis utitur, nos verò sine ullo delectu tot peregrinis vocibus linguam nostram augemus, an potius corrumpimus, ut timendum sit, ne reliqua etiam verba Polonica, quæ jam pauca nobis supersunt, prorsus intereant, nihilq; aliud lingua nostra sit, quam chaos quoddam ex variis variarum linguarum vocibus conflatum.

Olimus. Rectè tu quidem, Eudoxe. Universè tamen omnem poregrinarum vocum usum damnare non ausim, præsertim cum id necessitas postulet: hanc vero ex duplice capite posse oriri existimo. Primum est, cum id quod animo in epistola denuntiamus, ab aliis sciri nolumus. Hanc ob causam etiam Cicero non raro usus est in Epistolis suis Græco sermone , ut scilicet peregrinis verbis res arcanas obtegeret. Alterum, cum res aliqua nomine proprio caret, nec facilè per verborum ambitum explicari potest. Hinc Cicero Acad. quæst. lib. i. Nos verò, inquit, Atticus, quin etiam Græcis licebit utare, cum voles; si te latina forte deficient. Bene sane facis, sed enītar ut latine loquar , nisi in hujusmodi verbis, ut philosophi.

*am, aut Rhētorīcen, aut Phīsīcen, aut Dialectīcen appellem̄,
quibus ut a nīs multis consuetudo pro Latinis utitur.*

Medorus. Neq; ego adeo infestus sum vocum peregrinārum hostis, ut ad illam rem explicandam, quæ patrīd vocabulō efferi non potest, peregrinum adhibere nolim. Mallem tamen in locūm vocis illius, quæ nobis deest, ē Slavonica lingua deprompta vocabula substitui, quām ex Gallica, Germanica & aliis hujusmodi petita. Multò enim honestius est, linguaeque nostrae conuenientius, ex eo fonte, ex quo sermo noster profluxit, voces desumere, quām ab aliis linguis mendicare.

Orlandus. At Kochanouius Princeps Poētarum nostrorum nulla necessitate impulsus, in celebri illo suo carmine: *Et prope wysokum celeberrima sylva Cracovum Et Latina verba cum patriis temere permiscet.*

Olintus. Etiam tibi, Orlande, cū ludere jocariq; volueris, carmen ejusmodi condere per nos licebit. In seriis autem idem Kochanouius adeo religiose verba peregrina vitat, ut neminem Poētarum nostrorum reperias, qui purius elegantiūsq; illō scripserit.

Alcander. Ego vestrīs ô socii argumentīs jam plane vietus sum.

Orlandus. In eandem ego quoq; sententiam adducor:

Adraltus. Nihil æquiū est, rationiq; magis consentaneum nihil, ô socii, quām ut pestem illam peregrinam, quæ paucorum ostentatione nata, plurimorum deinde æmulatione aucta, & corruptiū etiam doctorum virorum judiciis
con-

conservata est, ex lingua nostra ejiciamus, ac funditus extermi-
nemus, ne in nos etiam illud intorqueri possit, quod Gregorius
Cnapius de majoribus nostris scriptum reliquit. *Reliquæ*, inquit
ille, gentes sermonem ac vestitum suum mordicus tuentur: soli nos
omnium linguarum & vestitum, dicam omnium horarum *Vertumni* &
Prothei esse pergemus. *Enim* vero si diligentius rem excutiamus,
nullam aliam gentem, quantumvis rudem ac barbaram, omnisiq;
scientiæ expertem reperiemus, quæ linguam suam peregrinis voca-
bus contaminari patiatur. Sed quid ego alias appellō gentes? Ipsi
nos Poloni, cum latine, Gallice, aut Germanice colloquimur, num
Polonica, aut alia hujusmodi vocabula in hunc sermonem intru-
dimus? Cur igitur ad solam linguam nostram, tanquam publicum
quoddam divisorium peregrinis istis vocibus aditus non inter-
cluditur? Cur soli nos... Sed pluribus abstineo, ne ridiculæ hujus
consuetudinis amatores, vehementius in me concitem. Gaudeo
tamen vehementer ô socii, in eam vos tandem sententiam
conspirasse, ut linguam vestram à peregrinis istis quisquiliis
expurgare in animum induxeritis. Restat, ut omnia vestra
studia, omnem operam, curam, industriam, cogitationem,
mentem deniq; omnem in eo figatis, ut in vestris scriptis sermo-
nibusq; voces peregrinæ nunquam audiantur. Id si pro vestris
viribus præstiteritis, & linguae nostræ nativam integritatem, &
vobis ipsis gloriam comparabitis immortalem.

Ad

M. D. G.



<http://rcin.org.pl>

2791

X
XVIII 2
- 19